

Ұстаз – ардақты әрі ұлы сөз. Құлаққа сіңісіп кеткен «ұстаз» сөзінің астарында білімнің қайнар бұлағы, ізденістің сара жолы, адамгершіліктің «алтын көпірі» жатыр. Жас буынға ұлттың ұлылығын ұлықтап қана қоймай, даналықтың даңғыл жолын дәріптейтін де ұстаз. Ол шәкіртінің өн бойына білім нәрін сіңіре отырып, туған жерін сүйеге, ата дәстүрін құрметтеп, ана тілін ардақтауға тәрбиелейді. Сондықтан болар, педагог – келешек ұрпақтың білім көкжиегіндегі ата-анасы.

МҰҒАЛІМ – ҚОҒАМ АЙНАСЫ

Мұғалім мәртебесінің биік болуы – қоғамның айнасы. Тәуелсіз Қазақстанның дамуына, қарыштап өсуіне үлес қосатын жандардың бірегейі де – ұлағатты ұстаздар. Ұлтымыздың саналы ұрпағын тәрбиелеп жатқан ұстаздардың еңбегі өлшеусіз. Қажырлық пен табандылықты, үнемі ізденісті талап ететін ұстаздарға жүктелген міндет те оңай емес. Білімдерін жетілдіру, заманауи жаңашылдыққа ұмтылу мақсатында педагогтер түрлі оқу курстарын оқиды, озық тәжірибелермен алмасады.

«Ұстаздық – ұлы құрмет. Өйткені, ұстаз ұрпақты тәрбиелейді. Болашақтың басысын да, ғалымы мен данасын да, еңбекқор егіншісін де, кеншісін де ұстаз өсіреді. Өмірге ұрпақ берген аналарды қалай ардақтасақ, сол ұрпақты тәрбиелейтін ұстаздарды да солай ардақтауға міндеттіміз», – деген екен халқымыздың батыр ұлы Бауыржан Момышұлы.

С о ң ғ ы ж ы л д а р ы «тәуелсіз қазақ қоғамындағы педагогтердің мәртебесі қандай» деген сауал көпшілігімізді мазалап жүргені жасырын емес. Кейінгі жылдарға шегінер болсақ, осыдан үш жыл бұрын Мемлекет басшысы

Қасым-Жомарт Тоқаев «Педагог мәртебесі туралы» заңға қол қойғаны баршамызға белгілі. Тарихи құжатта, ең алдымен, ұстаздардың беделі мен мәртебесін арттыру, кәсібінен тыс әкімшілік іс-шаралардан босатылуы, білім бағдарламасынан бөлек жүктелген тапсырмаларды қысқарту сынды басты мәселелер оң жолға қойылды. Ұстаздардың мәртебесін арттыру туралы заңнаманың «дүниеге келуіне» қоғамда туындап жатқан бірнеше мәселелер айқын дәлел бола алады. Себебі, аталмыш заң ұстаздар қауымына жаңаша серпін алуға мол мүмкіндік берді. Бекітілген құжат аясында мектеп мұғалімдері мен жоғары оқу орындары оқытушыларының құқығы мен көзқарасы заңдық тұрғыда қорғалатыны көңілге медеу ұялатты. Зайырлы мемлекетте заңға бағына отырып жұмыс жасай білсек, еліміздегі білімнің сапасы еселеніп түсетіндігіне сеніміміз мол.

Л.БЕГАЛИЕВА,
М.Әуезов атындағы
ОҚУ «Заманауи
педагогика және
психология»
кафедрасының аға
оқытушысы, магистр